

KAONGORA IBUKIN TE LEGAL YEAR OPENING 2023

Imwiin Motirawan ao Inin te Bowi ae Rietata (High Court) ao te Bowi n Tia Moti (Magistrates' Court) are e waaki man te Moanibong 9th January 2023 ao e na kanikinaeaki manga Ukin bowi aikai n te **Kanimabong 27th January 2023** n te botaki ni Kaukuki ke te Legal Year Opening n te **Sport Complex i Betio**. Ana uki raoi bowi aikai imwiin te National Judicial Conference are ana waaki man te Moanibong 30th January 2023 n te maan ae teuana te week.

Kanoan te Kaukuki anne aika a kakamataku ao are e taneiai te botanaomata n nonoria iaon Betio, bon te mwaati irouia taan makuri n te Botaki ni Kabowi n aron te Tia Moti ae Rietata ma ana aobitia, taan moti, ao lawyers ao are ana bon kairaki irouia bureitiman ma aia drum ao aia b'ai ni katangitang.

N te tai naba anne ao e na kanikinaeaki Ukin te National Judicial Conference 2022 are ngaia bukin rokoia Taan Moti man abamakoron Kiribati iaon Tarawa. Kanoan aio bon te reirei iaon kairan te bowi ao iaon taian tua aika a b'ainaki, riki ni kaineti ma aroia ataei aika uarereke inanon te bowi. E kukurei ni kaotia te Botaki ni Kabowi ba e manenaki aei man te UNICEF, te PJSP (Pacific Justice Sector Program (PJSP) mai New Zealand, ao te Tautaeaka ni Kiribati.

Aio ana tai te Botaki ni Kabowi n otinako nakon te botanaomata ao ni kaotia ba e mena irarikin te botanaomata ao bon ngaia naba taan beku ibukin te botanaomata. N te tai aio ao e na reke naba ana tai te botanaomata n noria ao ni kinaia Taan Moti mai iaon Kiribati, Makin nako Arorae. Tiaki tii anne ma e na katangaina ana waaki te Botaki ni Kabowi n te ririki 2022 rinanon ana Annual Report 2022.

Ibukina ba Kiribati bon te aba ni Kiritian ao e na waaki kanoan te bong anne n te taromaui inanon te umantabu, are n te tai aei ao e boo ana tai ni kawaraki te KUC Tatirerei i Betio ba e a tia ni kawaraki umantabun te Katorika n te Kaukuki are imaina.

Iruwa aika a rine n te tai anne bon rabatan Te Tautaeaka ni Kiribati aika kakawaki are e atunaki iroun te His Excellency Te Beretienti ao te Honourable Madam Tibiika n te Auti n Tei ake ana raonaki iroun te Tia Moti ae Rietata Her Honor Tetiro Semilota Maate Moaniba. Iruwa naba aika a rine n te bong anne bon rabatan tautaeaka mai abatera aika a mena aia aobiti i Kiribati, n ikotaki naba ma kautun ekaretia.